

**TEZAUUR LITURGIC**  
**27 OCTOMBRIE**

**ACATISTUL**  
**SF. CUVIOS**  
**NESTOR I**  
**CRONICARUL**  
**DE LA**  
**PECERSKA**



**MOSCOVA, 2000**



**Акафист**  
**преподобному и богоносному**  
**отцу нашему**  
**Нестору Летописцу**

**Кондак 1**

Избранников Божиих сожителю, иноче честный и летописче преславный, отче преподобне Несторе, приими приносимыя с любовью смиренныя похваления наша. Ты же, яко имея велие дерзновение на небеси, молися тепле о стране нашей и людех ея, во еже избавитися нам от всякаго зла, да зовем ти: Радуйся, Несторе, земли Русския первый летописателю.

**Икос 1**

Ангельскому иноческому житию поревновав и суету мира тленного презрев, во юности ранней притекл еси, отче преподобне, во обитель Печерскую града Киева, к стопам основателей ея Антония и Феодосия смиренно припадая и о сопричтении тя ко братии усердно моля. Того ради взываем ти:

Радуйся, от юности твоея Богу служити  
вожделевый.

Радуйся, благую часть от утра жития твоего  
избравый.

Радуйся, мир и вся его прелести оставивый.

Радуйся, Господа всем сердцем возлюбивый.

Радуйся, Несторе, земли Русския первый  
летописателю.

### **Кондак 2**

Видя благое произволение сердца твоего и  
провидяще в тебе сосуд благодатный  
добродетелей христианских, преподобный  
Феодосий с радостию велиею сопричисли ты ко  
братии обители своея и чина иноческаго ты  
удостои, умиленно поюще Богу: Аллилуиа.

### **Икос 2**

Разумом богопросвещенным возлюбил еси,  
Богомудре Несторе, научение книжное и зело к  
сему прилежа, аки пчела трудолюбивая, собирая  
сладчайший мед премудрости и умножая в души  
твоей во спасение сокровище неизждиваемое  
познания. Сего ради достоин явился еси  
похвалы сицевыя:

Радуйся, Премудрость просвещения книжного во младости стяжавый.

Радуйся, к собиранию многоценного бисера зело прилежавый.

Радуйся, медом познания истины от юности усладивыйся.

Радуйся, сокровищем негиблемым мудре обогативыйся.

Радуйся, Несторе, земли Русския первый летописателю.

### **Кондак 3**

Силу духовную от Владыки своего восприяв, преподобне, Тому жизнь свою безраздельне посвятил еси, воспевая благих Подателю Богу: Аллилуиа.

### **Икос 3**

Имея дарование духовное от Господа твоего, талант тебе данный не скрыл еси, аки раб нерадивый, но Господу помогающу ти многажды, добродетели в житии твоём умножил еси, рабе благий и верный, да прославится в тебе Творец всяческих, темже зовем ти:

Радуйся, вверенное тебе сокровище мудрости в  
земли не скрывый.

Радуйся, добродетелей вертоград богатый  
духовно возрастивый.

Радуйся, благий собирателю богатства  
нетленного.

Радуйся, обретый блаженство Рая  
вожделенного.

Радуйся, Несторе, земли Русския первый  
летописателю.

#### **Кондак 4**

Бури страстей житейских уклонился еси,  
угодниче Христов, во утишное пристанище  
святыя обители Печерския достигши, идеже с  
честными насельники сея не престававал еси пети  
Спасителю твоему: Аллилуиа.

#### **Икос 4**

Слыша наставление душеспасительное, от  
Богоноснаго Феодосия и иных честных отец,  
тебе неоскудно подаваемое, сему со тщанием  
последовал еси в пещерном затворении твоём,  
молитвою, пощением и о плоти нерадением  
укрепляемь в подвизе многотрудном жития

иноческаго. Сего ради слышиши ныне хваления  
сицевая:

Радуйся, от юности во мрак пещерный,  
спасения ради, вселивыйся.

Радуйся, тамо непрестанною молитвою от  
треволнения житейскаго оградивыйся.

Радуйся, яко в подвизе твоём наставника  
богомудраго Феодосия имел еси.

Радуйся, наставлением сего послушливо внимал  
еси.

Радуйся, Несторе, земли Русския первый  
летописателю.

### **Кондак 5**

Боготечною стезею текл еси, отче преславный,  
ничесоже суетнаго желая, но града горняго,  
вечнаго взыскуя, Господу же неустанно поя:  
Аллилуиа.

### **Икос 5**

Видя неустанныя труды твоя, ко спасению  
души направляемья и радующеса братски о  
преуспянии твоём в подвизе жития  
монашескаго, вси иноцы обители Печерския  
восхваляху тя сице:

Радуйся, трудниче неустанный, яко мзды  
благия достоин явился еси.

Радуйся, подвижниче добрый благочестия, яко  
в подвизах твоих не изнемогал еси.

Радуйся, образ честный жития иноческаго  
братии являй.

Радуйся, в смирении и кротости душевной всех  
присно наставляй.

Радуйся, Несторе, земли Русския первый  
летописателю.

### **Кондак 6**

Провозвестника славы отеческия обрете тя,  
Несторе досточудне, страна Русская, уведев бо  
минувшия судьбы ея, письмены предал еси вся в  
научение, наставление и назидание родом  
грядущим, да тии уведевше промышление  
Божие к языку Словенску, воспоют Благому  
Промыслителю своему: Аллилуиа.

### **Икос 6**

Возсил еси, яко солнце светоносное, в Русстей  
земли, Богоблаженне отче, неведения бо мрак  
глубочайший, от века ю покрывающий, твоими  
писаньми первее озарил еси, к свету ведения и

Богопознания соотчичи твоя призывая, от нихже сицевое похваление достойно восприял еси:

Радуйся, мглу неведения варварскаго в народе нашем разгнавый мудрости сиянием.

Радуйся, просвещению отечества послуживый твоим летописанием.

Радуйся, над сим усердно до кончины живота твоего труждайся.

Радуйся, ко труду писания теплою молитвою уготовляйся.

Радуйся, Несторе, земли Русския первый летописателю.

### **Кондак 7**

Хотяй свидетелем дивнаго чудеси тебе, отче, явити Господь Вседержитель, внуши тайно игумену Печерскому Иоанну, да вверено ти будет, купно со иным от братии, ископати погребенное в земли тело наставника твоего преподобнаго Феодосия, по симинадесятех летех от кончины сего, во уверение благодати Божия, на нем явленней. Темже узревши того во гробе нетленна суща и чудеса велия источающа,

радуясь воспел еси со иноки Печерскими чудес  
Содетелю Богу: Аллилуиа.

### **Икос 7**

Новый труд на пользу и в научение христианом  
подъял еси, преподобне Несторе, во еже списати  
житие великаго угодника преподобнаго  
Феодосия, иже бе, купно со богоносным  
Антонием, первоначальником богоугоднаго  
иноческаго жития в земли Русстей и строитель  
обители Печерския, ей же устав от славныя  
киновии Студийския восприяв, той во веки  
соблюдати в ней заповеда. Темже и мы,  
благодарни суще за таковое твое к нам  
недостойным попечение, единомушно славим тя,  
отче, тако:

Радуйся, жития преподобнаго Феодосия  
благоговейный сказателю.

Радуйся, сему в подвизе твоём ревностный  
подражателю.

Радуйся, повестию твоею верныя утешивый.

Радуйся, тою ко иноческому подвигу многия  
подвигнувый.

Радуйся, Несторе, земли Русския первый  
летописателю.

## Кондак 8

Странник и пришлец был еси, Несторе, на земли, ко временному и тленному бытию никакоже прилепясь, но ум и сердце устремляя ко блаженству нескончаемому Отечества Небеснаго, идеже ныне со Ангелы в веселии зовещи: Аллилуиа.

## Икос 8

Все житие твое, Боголюбезне отче, Спасителю твоему и ближним посвящено бысть. Сердцем бо чистым заповедь Христову восприим, любви закон благодатный исполнил еси, в меру сил труждаяся на пользу братьий твоих и выну прославляя Возлюбленнаго тобою Господа. Темже от Того прославление на небеси улучив, слышиши на земли блажащих тя похвалы сими:

Радуйся, светлый образе братолюбия и смирения.

Радуйся, благий наставниче трудолюбия и терпения.

Радуйся, спасению ближних крепце поревновавый.

Радуйся, похвалы от сих достойно приявый.

Радуйся, Несторе, земли Русския первый летописателю.

### **Кондак 9**

Всякое наслаждение плотское возненавидел еси, преподобне отче Несторе, и житие иноческое возлюбил еси, темже и Господь возлюби тя, прослави и дарова нам, яко молитвенника усерднаго, выну поющего Ему: Аллилуиа.

### **Икос 9**

Витий многословных паче краткими словесы твоими землю Отечества нашего прославил еси, мудре наставниче, от «Повести временных лет»: уведехом бо откуда есть пошла Русская земля, юже велиею сыновнею любовью возлюбил еси. Сего ради сынове словенорусстии во вся роды и до ныне восхваляют тя, глаголюще:

Радуйся, риторы славныя в простоте слова твоего превосходяй.

Радуйся, мудростию научения твоего нас любовью озаряй.

Радуйся, Отечества земнаго верный любителю.

Радуйся, о благе земли твоея усердный ревнителю.

Радуйся, Несторе, земли Русския первый летописателю.

### **Кондак 10**

Спасения путь узкий и многотрудный волею избрал еси, Богоносне, и лица твоего николиже вспять обратил еси, к светозарному Солнцу правды Христу Богу выну очи твоя обращаяй и Того прославляя песнию хвалебною: Аллилуиа.

### **Икос 10**

Стеною упования несумненного оградил еси, преподобне, душу твою от всякаго искушения и соблазна, верою крепкою познавая полноту благодати и милосердия Создателя твоего. Того ради слышиши от нас, недостойных и отчаянием колеблемых, таковая:

Радуйся, в души возрадивый благоуханный цвет добродетели.

Радуйся, верою невидимых, аки видимых, чаемых и ожидаемых, яко сущих, истинный свидетелю.

Радуйся, благочестия христианского  
неленостный поборниче.

Радуйся, изнемогающих в тягостном сомнении  
благий укрепителю и помощниче.

Радуйся, Несторе, земли Русския первый  
летописателю.

### **Кондак 11**

Пение хвалебное от сынов Русских по  
достоянию приемлющи, отче досточудне,  
любовию твоею не престай заступати от всех бед  
и скорбей землю отеческую нашу, в нейже выну,  
прославляется имя Господне песнию: Аллилуиа.

### **Икос 11**

Светолучными сиянии любви Божественныя  
уязвивыйся, летописче преславне, образы сея  
явил еси житием страстотерпец святых  
благоверных братьев Бориса великодушнаго и  
Глеба кроткаго, да им последующе, добродетели  
братолюбия, отечестволюбия, смирения и  
послушания приобрящем, тебе же, деяний сих  
списателя богомудра, восхвалим сице:

Радуйся, яко благодать Божественная на тебе  
неоскудно почиваше.

Радуйся, яко тою умудряемь, угодники Божия с любовью прославил еси.

Радуйся, о благе земли твоея неустанный молитвенниче.

Радуйся, отечестволюбцем и мудрости познания искателем присный помощниче.

Радуйся, Несторе, земли Русския первый летописателю.

### **Кондак 12**

Благодатный источник наставлений Богоугодных обретохом в тебе, отче Несторе, житием бо и списаньми твоими вся утверждаеши шествовати неуклонно во след Единому Человеколюбцу и Спасителю нашему Богу, зовуще Ему: Аллилуиа.

### **Икос 12**

Поюще Богоугодное житие твое, Несторе преславне, со умилением прославляем труды и подвиги твоя, имиже Христу Спасу зело угодил еси, и восхваляем дивное смотрение Божие на тебе, в нетлении мощей твоих доньне являемое. Почитая же мирную и непостыдную кончину твою, поклоняемся неизследимому Промыслу Всевышняго, сподобльшаго тя причастника

быти неизреченная славы Своея в селениях праведных, отнюдуже приклони ухо твое ко гласом нашим, взывающим ти сице:

Радуйся, козни, коварства и злобы демонския расторнувый.

Радуйся, духом твоим невозбранно в горняя обители востекший.

Радуйся, во мраце пещернем телом твоим нетленно до днесь почиваяй.

Радуйся, от мощей твоих многую помощь чтущим тя неоскудно подаваяй.

Радуйся, Несторе, земли Русския первый летописателю.

### **Кондак 13**

О, преславный угодниче Божий, Богомудре отче Несторе! Призри любовь твою с высоты небесная на скорбь и слезы собратий твоих земных и умоли Всемилосерднаго Господа избавити землю Русскую и чад ея от бед и напастей, да восхвалим человеколюбие и щедроты Его, воспевающе выну: Аллилуиа.

(сей Кондак глаголи трижды)